

«Քրիստալ Լեյք Հոլդինգս» ՍՊԸ կողմից ՀՀ Գեղարքունիքի մարզի Սևան համայնքի Չկալովկա և Նորաշեն բնակավայրերի ափամերձ հատվածում տեղակայված հողատարածքներում նախատեսվող հյուրանոցային համալիրի և բազմաֆունկցիոնալ կոնֆերանս կենտրոնի կառուցման շրջակա միջավայրի վրա ազդեցության վերաբերյալ 2024թ. նոյեմբերի 27-ին՝ ժամը 11:15-ին **Չկալովկա բնակավայրի** վարչական ղեկավարի նստավայրում իրականացված հանրային լսման (առաջին հանրային լսում)

## ԱՐՁԱՆԱԳՐՈՒԹՅՈՒՆ

Սևան համայնքի Չկալովկա բնակավայր

27.11.2024թ.

2024 թվականի նոյեմբերի 27-ին՝ ժամը 11:15-ին, ՀՀ Գեղարքունիքի մարզի Սևան համայնքի Չկալովկա բնակավայրի վարչական ղեկավարի նստավայրում «Շրջակա միջավայրի վրա ազդեցության գնահատման և փորձաքննության մասին» ՀՀ օրենքի /օրենքի խմբ. 03.05.2023, ՀՕ -150-Ն/ 10-րդ, 11-րդ, 16-րդ հոդվածների և ՀՀ կառավարության 2014թ. նոյեմբերի 19-ի «Հանրության իրազեկման և հանրային լսումների ծանուցման բովանդակությունը, հանրային լսումների ընթացակարգը, շրջակա միջավայրի վրա ազդեցության գնահատման և փորձաքննության գործընթացում շահագրգիռ հանրության կարծիքների, դիտողությունների և առաջարկությունների ներկայացման, տեղական ինքնակառավարման մարմինների կողմից նախնական համաձայնության կամ անհամաձայնության տրամադրման ընթացակարգը և ժամկետները սահմանելու մասին» N1325-Ն որոշմամբ /որոշման խմբ. 28.12.2023, N 2343-Ն/ սահմանված կարգով, տեղի ունեցավ «Քրիստալ Լեյք Հոլդինգս» ՍՊԸ կողմից ՀՀ Գեղարքունիքի մարզի Սևան համայնքի Չկալովկա և Նորաշեն բնակավայրերի ափամերձ հատվածում տեղակայված հողատարածքներում նախատեսվող հյուրանոցային համալիրի և բազմաֆունկցիոնալ կոնֆերանս կենտրոնի կառուցման շրջակա միջավայրի վրա ազդեցության վերաբերյալ հանրային լսումը (առաջին հանրային լսում):

Ներկա էին Սևանի համայնքապետարանի ներկայացուցիչ Հայկ Ղուկասյանը, Չկալովկա բնակավայրի վարչական ղեկավար Վահրամ Կարապետյանը, «Սևան» ԱՊ ներկայացուցիչ Արմեն Բարսեղյանը, Գեղարքունիքի մարզպետարանի ներկայացուցիչ Դավիթ Զանգեզուրյանը, նախաձեռնողի ներկայացուցիչ Արթուր Մկրտչյանը և համայնքի մի շարք բնակիչներ (մասնակիցների ցանկը՝ ստորագրություններով և տեսաձայնագրությունը կցվում են արձանագրությանը):

Բացման խոսքով հանդես եկավ Չկալովկա բնակավայրի վարչական ղեկավար Վահրամ Կարապետյանը և խոսքը փոխանցեց Սևանի համայնքապետարանի

ներկայացուցիչ Հայկ Ղուկասյանին, ով ասաց, որ ծրագրին և էսքիզային նախագծին ծանոթ լինելով՝ կարող է միայն դրական կարծիք հայտնել նախաձեռնվող գործունեության վերաբերյալ և փոխանցեց համայնքի ղեկավարի ու համայնքի ղեկավարի տեղակալի դրական կարծիքը և աջակցության պատրաստակամությունը օրենքի շրջանակներում կատարվող ներդրումներին:

Այնուհետև Չկալովկայի վարչական ղեկավար Վահրամ Կարապետյանը ներկայացրեց լսման մասնակիցներին և խոսքը փոխանցեց նախաձեռնողի ներկայացուցիչ Արթուր Մկրտչյանին:

Ա. Մկրտչյանը մանրամասն ներկայացրեց «Քրիստալ Լեյք Հոլդինգս» ՍՊԸ կողմից Չկալովկա և Նորաշեն բնակավայրերի ափամերձ տարածքում նախատեսվող գործունեությունը, մասնավորապես տեղեկացրեց, որ ծրագիրը իրականացվելու է Սևան համայնքի Չկալովկա և Նորաշեն բնակավայրերի ափամերձ հատվածում տեղակայված մոտ 31,8 հա հողատարածքների վրա, որից սեփականության իրավունքով պատկանում է 28,16 հա հողատարածքը և 3,6 հա հողատարածքը ազգային պարկի տարածքում է, որը կառուցապատման իրավունքով տրամադրված է ընկերությանը, սեփականության իրավունքով հողատարածքները տեղակայված են միայն Չկալովկա բնակավայրի տարածքում, իսկ կառուցապատման իրավունքով հողատարածքները տեղակայված են և՛ Չկալովկա և Նորաշեն բնակավայրերի տարածքներում:

Ա. Մկրտչյանը շարունակելով ասաց, որ նախատեսվող կառուցապատման հիմքում դրված է լանդշաֆտի առավելագույն պահպանման և ներդաշնակ միջավայրի ձևավորման սկզբունքը, ինչի արդյունքում ստեղծվում են զբոսաշրջության զարգացման և միաժամանակ բնության պահպանության համար անհրաժեշտ նախապայմանները: Տարածքում ընտրված տարբեր դիտակետերից լայն տեսարաններ են բացվում դեպի Սևանա լիճը եվ թերակղզին:

Ա. Մկրտչյանը շարունակեց՝ ասելով, որ ներդրումային ծրագրի առաջին փուլով նախատեսվող շինարարական օբյեկտների մեջ հիմնական դոմինանտը 161 տարբեր դասերի համարներով հյուրանոցային համալիրն է, որի կառուցապատման մակերեսը կազմում է մոտ 7000 քմ, ընդհանուր մակերեսը՝ 25878 քմ: Այն իրենից ներկայացնում է Սևան-Մարտունի-Գետափ ավտոճանապարհի կողմից 4 հարկանի շինություն՝ ներառյալ ձեղնահարկը, իսկ դեպի լիճ, հաշվի առնելով ռելիեֆի առանձնահատկությունները՝ քիչ քիչ դառնում է մեկ հարկանի: Շենքում նախատեսված են հանգստի և սպասարկման համար տարածքներ, այդ թվում՝ առևտրի տաղավարներ, 400 տեղով ռեստորան, մոտավորապես նույն

քանակությամբ մարդկանց սպասարկելու համար նախատեսված ֆուդ քուրս, բար-սրճարաններ, փակ լողավազան, շոգեբաղնիքներ, մարզասրահներ՝ իրենց հանդերձարաններով, բաց տեռասային բար-սրճարաններ: Ամենակարևորը, որպեսզի շինությունը ծառայի տարին տասներկու ամիս, մենք ունենք ապակեպատ ատրիում բակ, որի տարածքում տեղակայված են զվարճանքի, ժամանցի տարբեր հնարավորություններ, շարժասանդուղքների միջոցով շենքի տարբեր մակարդակներ իջնելու հնարավորություն և փակ լողավազան:

Ա. Մկրտչյանը նշեց, որ հյուրանոցային համալիրը տեղակայված է 1905 մ. բացարձակ նիշից բարձր, նույնիսկ ավելին՝ 1908 մ. բացարձակ նիշից էլ բարձր, քանի որ իրենք տեղեկացված են, որ 1908 մ-ը դեռևս 1978թ.-ից նախատեսված էր, հետո 2000-ականների սկզբում փոխվեց դառնալ 1905 մ. և կարծում են, որ հնարավոր է, որ հետագայում նորից փոխվի դառնա 1908 մ.: Նշեց նաև, որ հյուրանոցային համալիրը ավտոճանապարհից մոտ 20-27 մետր հեռավորության վրա է գտնվում, ինչը տեղավորվում է գործող շինարարական նորմերի մեջ:

Ա. Մկրտչյանը ներկայացրեց ծրագրով նախատեսված մյուս շինությունը՝ բազմաֆունկցիոնալ կոնֆերանս կենտրոնը, ասելով, որ այն զբաղեցնում է 2346 քմ. և ունի 6900 քմ. ընդհանուր մակերես, երկհարկ է, հաշվի առնելով ռելիեֆի առանձնահատկությունները՝ լճի կողմից եռահարկ է: Շենքում նախատեսված են միջոցառումների և խորհրդակցությունների սրահներ, ցուցասրահներ, գիշերային ակումբ, երաժշտական սրահ, ռեստորաններ, բացօթյա սրճարան, ժամանցի համար նախատեսված այլ տարածքներ և ստորգետնյա պահեստ, որը անհրաժեշտության դեպքում կարող է ծառայել որպես թաքստոց ու նմանատիպ տարածք կա նաև հյուրանոցային համալիրում: Ա. Մկրտչյանը նշեց, որ այս շենքը նույնպես 1905 մ. և նույնիսկ 1908 մ. նիշից բարձր է գտնվելու:

Ա. Մկրտչյանը շարունակեց, ասելով, որ դեպի հանգստի գոտի մուտքը և էլքը նախատեսված է իրականացնել երկրորդական ճանապարհից: Ներքին ճանապարհային մոտեցումները իրականացվել են՝ հաշվի առնելով տեղանքի ռելիեֆի և լանդշաֆտի առանձնահատկությունները՝ միաժամանակ ապահովելով հյուրանոցի, բազմաֆունկցիոնալ կոնֆերանս կենտրոնի ու հետագա փուլերում կառուցվելիք քոթեջային թաղամասերի սպասարկման համար օպտիմալ հասանելիությունը: Նախատեսվել է մոտ 192 ավտոմեքենաների համար ավտոկայանատեղի, որը գտնվում է սեփականության իրավունքով իրենց պատկանող հողատարածքում:

Վ. Կարապետյանը հարցրեց, թե արդյո՞ք դա ընկնում է դեպի Գավառ ուղղության աջ կողմում:

Ա. Մկրտչյանը ասաց, որ այն ընկնում է դեպի Գավառ ուղղության ձախ կողմում, և դա ազգային պարկի տարածքում չէ:

Վ. Կարապետյանը հարցրեց, թե հյուրանոցի շենքը լճի կողից մեկ հարկ է, իսկ հակառակ կողմից 8 հարկ, 7 հարկ, հաշվի առնելով լճի մակարդակը, թեքությունը լանդշաֆտի, ինչպիսի՞ն է շենքի դիրքը:

Ա. Մկրտչյանը պատասխանեց, որ շենքը սկզբում 4 հարկ է, քիչ քիչ աստիճանաձև իջնում է և ամենաներքևի նիշը 1908-ից բարձր է:

Վ. Կարապետյանը շարունակեց հարցնել, թե լճի կողմից նայելով քանի հարկ են տեսնելու:

Ա. Մկրտչյանը ասաց, որ 4, և ասաց, որ գծագրով ցույց կտա կտրվածքները և ամեն ինչ պարզ կդառնա:

Ա. Մկրտչյանը շարունակելով ասաց, որ 1905 մ. բացարձակ նիշից ներքև ընկած բոլոր տարածքները նախատեսված են որպես լողափային գոտիներ, որոնց ընդհանուր մակերեսը կազմում է մոտ 1 հա.: Կանաչ գոտիների ընդհանուր մակերեսը կազմում է 24390 քմ., ինչը ընդհանուր մակերեսի մոտ 76,68 %-ն է, ինչը գործող գլխավոր հատակագծի նորմերի մեջ է:

Ա. Մկրտչյանը շարունակեց, ասելով, որ Սևան-Մարտունի-Գետափ ավտոճանապարհի աջ կողմում ընկած սեփական հողատարածում կառուցվելու է խմելու ջրի մատակարարման և հակահրդեհային անվտանգության համակարգի գործունեության համար նախատեսված թվով 2 ջրամբարներ, իսկ ձախ կողմում տեղադրելու է նորմատիվ պահանջներին համապատասխան հզորությամբ կոյուղաջրերի մաքրման ժամանակակից կայան: Հյուրանոցային համալիրի եվ բազմաֆունկցիոնալ կոնֆերանս կենտրոնի էլեկտրասնուցման ենթակայանի, ջեռուցման և սառեցման համակարգերի, ջրամատակարարման պոմպակայանների համար նախատեսված շինությունները տեղադրվելու են Սևան-Մարտունի-Գետափ ավտոճանապարհի ձախ կողմում, նույնպես սեփական հողատարածքում, սույն գլխավոր հատակագծով ենթակառուցվածքների համար առանձնացված մեկ ընդհանուր տարածքում:

Ա. Մկրտչյանը ամփոփելով ասաց, որ պատրաստ է պատասխանել հարցերին և կարող է ներկայացնել նախագիծը:

Չկալովկայի բնակիչ Արմեն Թորոսյանը հետաքրքրվեց, թե որտեղից են ստանալու ջուրը:

Ա. Մկրտչյանը պատասխանեց, որ օգտվելու են Գավառից եկող մայրուղային ջրագծից, որտեղից իրենց պահանջարկի համեմատ քիչ ջրաքանակ են տրամադրել, և որպեսզի ջրաքանակը բավարարի, իրենք կառուցելու են ջրամբարներ, օրվա համար նախատեսված ջրաքանակը կուտակելու են ջրամբարներում, որպեսզի մատակարարման խնդիրներ չունենան:

Չկալովկայի վարչական ղեկավար Վ. Կարապետյանն նույնպես ցանկություն հայտնեց պատասխանել բնակչի հարցին և ասաց, որ Գավառում կա երկու պոմպ և եթե երկու պոմպն էլ աշխատեն, ապա որևէ խնդիր գյուղը չի ունենա, և տեխ. պայմանի առկայության դեպքում «Վեոլիա ջուր» ընկերությունը պետք է տա, ապահովի այդ քանակությունը: Նա ավելացրեց, որ եթե ամռանը միացնեն միայն մեկ պոմպը, ապա դա նույնիսկ առանց այս ծրագրի իրագործման էլ գյուղին չի բավարարի, ասաց, որ արդեն ստիպված պետք է անպայման մյուս պոմպն էլ միացնեն, որ բոլորի պահանջարկը բավարարեն: Վ. Կարապետյանի հարցին, թե արդյո՞ք այս տարի դժգոհ են եղել, բնակիչը պատասխանեց, որ ոչ, դժգոհ չեն եղել:

Ա. Մկրտչյանը ասաց, որ իրենք հույս ունեն, որ բացի իրենց ծրագրից այլ նման ծրագրեր ել կիրագործվեն և դա պետական տարբեր մարմիններին ստիմուլ կհանդիսանա ենթակառուցվածքները զարգացնելու և հզորացնելու համար, քանի որ պահանջարկը մեծանալու է: Եթե մենք ցանկանում ենք տարածաշրջանը զարգանա, ապա պետք է ենթակառուցվածքները զարգացնենք:

Վ. Կարապետյանը հարցրեց, թե որքան է ծրագրի իրագործման մոտավոր պայմանագրային արժեքը:

Ա. Մկրտչյանը պատասխանեց, որ առաջին փուլում ներառված հյուրաբոցային համալիրի և կոնֆերանս կենտրոնի միայն շինարարության արժեքը կազմելու է մոտավորապես 30-40 միլիոն ԱՄՆ դոլար, իսկ հաջորդ փուլի հետ միասին, որը ներառելու է քոթեջային թաղամասերի կառուցում, որի ՃՀԱ-ն դեռ չեն ստացել, բայց դիմելու են ստանալու համար, կկազմի մոտավորապես 70-90 միլիոն ԱՄՆ դոլար:

Վ. Կարապետյանը ասաց, որ կարելի ասել, թե տարածքշրջանում նմանատիպ պրոյեկտ դեռ չի իրականացվել:

Ա. Մկրտչյանը ասաց, որ եթե վերցնենք Սևանա լճի տարածաշրջանը, այո նման բան չի իրականացվել, շատ լավ կլինի, որ իրագործվի և մեծ հույս ունի, որ սա նաև տրիգեր, սկիզբ կհանդիսանա, որ կողքի տարածքներն էլ սկսեն զարգանալ որպես զբոսաշրջային ռեկրեացիոն լիարժեք գոտի:

Ա. Մկրտչյանը նաև նշեց, որ իրենց համար առաջնային է բնապահպանական բոլոր նորմերին համապատասխան գործելը, իրենք այդ տեսակետից շատ լուրջ ուշադրություն են իրականացրել նախագծային աշխատանքների ժամանակ, բոլոր նորմերը, նորմատիվները պահպանվում են, անցնելու ենք նաև լիարժեք համալիր փորձաքննություն և այդ ընթացքում բոլոր խնդիրները լուծում կստանան:

Վ. Կարապետյանը ասաց, որ բնական է, առանց նորմերը պահպանելու շինարարությունը չեն հանձնի:

Ա. Մկրտչյանը նախագծի կազմի վրա տպված պատկերի վրա մանրամասն ներկայացրեց շինությունների առանձնահատկությունները, ասաց, որ ապակեպատ փակ տարածքը հնարավորություն է տալիս Սևանի 1,5-2 ամիս տևող սեզոնայնության խնդիրը վերացնել և տարին 12 ամիս մատուցել ծառայություններ:

Ա. Մկրտչյանը ներկայացրեց նախագծի մեջ ներառված տարածաշրջանի գլխավոր հատակագծի և Սևանա լճի կենտրոնական գոտու կառուցապատման համար նախատեսված տարածքների գոտիավորման նախագծի հետ համադրված իրենց հողատարածքները, ասաց, որ դրանք ամբողջությամբ համապատասխանում են այդ գոտիավորման պահանջներին: Ներկայացրեց նաև տարբեր մասշտաբների իրավիճակային հատակագծերը, Google-ի արբանյակային քարտեզի վրա տեղակայված իրենց հողատարածքները, իրենց կազմած գլխավոր հատակագիծը և կառուցվելիք շինությունների գծագրերը՝ ցանկացողներին հրավիրելով ավելի մանրամասն դիտարկելու:

Վ. Կարապետյանը, ասաց, որ ամենակրկնոր հարցը, որ հիմա իրեն հետաքրքրում է, դա այն է, թե բոլոր իրավական գործընթացների ավարտից հետո երբ է նախատեսվում շինարարության մեկնարկը:

Ա. Մկրտչյանը պատասխանեց, որ եթե հասցնեն մինչև գարուն ավարտել համալիր փորձաքննությունը և ստանան շինարարության թույլտվություն, ապա գարնանը կսկսեն:

Վ. Կարապետյանը ասաց, որ Հ. Ղուկասյանն էլ է փաստել, որ համայնքը երկու ձեռքով կողմ է, աջակից է, և դեռ 2017թ.-ից սրա շուրջ ինքն էլ աշխատել է և ցանկացած ներդրումային ծրագրի հետ կապված համայնքը բաց է և պետության հետ կապված էլ խնդիր չի տեսնում:

Ա. Մկրտչյանը ասաց, որ միշտ զգացել են համայնքի աջակցությունը, թե Սևան համայնքից, թե մանավանդ Չկալովկայից, Նորաշենից էլ նույնպես աջակցել են: Ասաց նաև, որ իրենք իրենց վրա վերցրել են սոցիալական պարտավորություններ, համայնքում տարբեր ծրագրեր են իրականացվելու, ծրագրի ներդրողը մինչև այս էլ ծրագրեր է իրականացրել:

Վ. Կարապետյանը ասաց, որ ներդրողը Բաղդասարյան Ալեքն է, որը տեղի դպրոցում բավականին մեծ ավանդ ունի, որպես բարերար վերանորոգման աշխատանքներ է ֆինանսավորել:

Ա. Մկրտչյանը ասաց, որ դա կշարունակվի նաև որպես հիմնական աշխատուժ կներգրավվեն մոտակա բնակավայրերի բնակիչները, որոնք կուղարկվեն համապատասխան վերապատրաստման:

Ա. Մկրտչյանը և Վ. Կարապետյանը փաստեցին, որ ներսի մարդիկ ավելի սրտացավորեն կվերաբերվեն:

Ա. Մկրտչյանը կրկին հայտնեց իր կողմից հարցերին պատասխանելու պատրաստակամությունը:

«Սևան» ԱՊ ներկայացուցիչ Ա. Բարսեղյանը ասաց, որ իրենք էլ են ողջունում ցանկացած ներդրում մանավանդ ազգային պարկի տարածքում, բայց քանի որ նախագիծ չի ներկայացվել ազգային պարկին, իրենք տեղյակ չեն թե կոնկրետ ինչ կառուցապատում է նախատեսվում և ինչ նիշերի վրա, չնայած որ նախաձեռնողի ներկայացուցիչը ներկայացրեց նիշերը:

Ա. Բարսեղյանը խնդրեց, որ նախագիծը ներկայացնեն նաև ազգային պարկ, որից հետո իրենց դիտարկումները հաջորդ նիստի ժամանակ կհնչեն, նաև հորդորեց, որ կառուցապատումը լողափի և բուֆերային գոտում կատարվի կառավարության 1563 որոշման պահանջներին համապատասխան:

Ա. Մկրտչյանը ասաց, որ կներկայացնեն նախագիծը ազգային պարկ, նաև ավելացրեց, որ որոշ նախագծային լուծումներ սկզբնական փուլում ներկայացրել են, բայց հիմա ավելի համալրված կներկայացնեն:

Վ. Կարապետյանը հայտնեց իր վստահությունը, որ ամբողջ գործընթացը կգնա բարձր մակարդակի վրա, օրենքի տառին համապատասխան:

Ա. Մկրտչյանը մասնակիցներին կրկին հարցրեց հարցեր ունեն թե ոչ և խնդրեց, որ ստորագրեն մասնակիցների ցանկը:

Մասնակիցները ստորագրեցին ցանկը և նիստը փակվեց:

Քննարկումների վարող

Սևանի համայնքապետարանի աշխատակից \_\_\_\_\_ Ն. Ղուկասյան

Նախաձեռնողի ներկայացուցիչ՝

\_\_\_\_\_ Ա. Մկրտչյան